

晚晴簃詩匯

第四九冊

晚晴簃詩匯卷一百二十七目錄

吳清鵬 十二首

許乃賡 三首

李惺 十五首

羅瑛 三首

譚敬昭 四首

閔學海 一首

丁泰 二首

張日最 二首

沈兆雲 六首

凌泰封 五首

楊延亮 一首

倪濟遠 六首

時式敷 一首

吳曾貫 三首

邵堂 九首

龔璫 三首

裕貴 二首

方履錢 九首

王之棠 二首

許麗京 六首

李雲章 六首

張振夔 一首

王言一首

李貽德九首

孫士鵬一首

朱葵之九首

張其英一首

晚晴移詩匯卷一百二十七

徐世昌

吳清鵬字程九一字西穀號笏庵錢塘人嘉慶丁丑一

甲三名進士授編修歷官順天府丞有笏庵詩鈔

符南樵曰笏庵爲穀人祭酒哲嗣詩有家法論詩十
首中云傷廉必捐愛知難務去陳初奏有萬端終曲
無二旨新機無故守幽理無顯呈偶觸似有得欲
語仍難名盡得此中甘苦之味而非苟作者矣
詩話笏庵愿諫垣擢府丞去官後主講揚州遂家焉
出處頗有家風詩格出入西江性清摯而骨幹峻與
有正味齋旨趣不同讀漁洋集戲題云長白山頭感
神女小黃園裏吊昭靈秦祠漢冢知多少動費先生
雪涕零略見微意

屯田行

征塵蔽原日馬鳴車郎當送者至燕郊行人俱束裝問之
隸旗籍平生惟食糧今將赴營田盡室載邊疆百年重安

土遷徙亦非常朝辭六親出暮宿孤驛傍四野無人煙但聞狐與狼回頭望都邑行色轉淒惶萬里苟不到焉知爲樂鄉吾觀朝廷意爲汝謀久長又念道路苦官爲送啟行行者各有給助汝充橐囊矧聞將軍賢撫養甚周詳雙城雖云遠土沃宜稻粱已令具稼器卽與營田房井地各著界廬舍互相望身旣免役隸官又無輸將犁鋤雖習苦四體庶自強歲晚足狐兔射獵多閒場一年成村聚三年富城隍去去保家室慎勿懷疑傷

荒谷

路細通山石林深覆野篁亂花開廢豕孤鳥下寒塘牧跡緣溪盡樵聲隔嶺長平生愛岑寂此地太幽荒

補題潘紅茶

恭辰

方伯奉使富良江圖

海南島國雜百夷，映徒黎母荒。是非強食弱肉，鳥獸欺亂。
絲轆轉不足，釐舊阮復收。新阮基牛馬，內首就繼縻。終王
入表，帝曰：咨浩蕩如天，包以慈爾。疆爾理我，爾綏惟恭。辰
汝其往，治賜一品服。上公儀富良，渡江南風微。朱衣照水
開，旌旗龍伯罷釣。蛟女嘻驅駕，蛟螭從靈。蠟珠宮晃漾，搖
玻璃。蝨蜓視之無，嶮巖八月不誤星。槎期白象，崑崙蒙虎
皮。蓮花蹴踏王所騎，郊迎館入延賓扉。宣以意示以德，威
百花樓前歌舞嬉。歡留十日盡，汝私天子命我無久羈。賓
幣百筐元纁緋，珊瑚木難珠貝璣。攬衣一笑手卻揮，輕裝
載石歸乎歸。何用陸賈多金爲？

書姚少師祠壁

邢臺杖錫據戎鞍

劉秉忠邢臺人

吳苑袈裟擁戰壇

少師蘇州人

若輩

勤關天數出當時真有帝師看奇功白帽加王易冷語青
裙見姊難莫倚空山祠宇在十三陵草已漫漫

小雅侍御罷職後將歸隱金華

司徒堂下狐狸語御史臺中鳳皇去同時罷削七十人第
一聲名最賢素馬鳴蕭蕭落日殘北風中人行路難天寒
地閉龍蛇蟄樹空枝多鳥雀歡知君心愛蘭溪水東欲入
山訪松子不下飛飛羨海鷗無言去去思桃李君不見將
軍萬里又邊行丞相孤身方道死莫言西第頌功成休說
東山濟時起山中若遇牧羊兒也應問我歸何時蓬萊一
謫三千歲早晚人間候滿期

閩重陽日集家紅生

葆晉

舍人寓宅酒後登閣望西

山追和陳紫瀾先生原韻蓋先生官楚時以贈舍

人尊祖者七十七年矣

孟公楚北重陽社今日長安復此閒
往者尊前逝東水我來籬下見西山
酒場絕續百年內花事扶持一月間
誰似前賢才不愧流傳詩思滿江關

獨夜

露寒侵徑蔓風勁折簷枝
烏宿危相戒螢飛暗不欺
南江船到少西極馬來遲
萬事能無責深慚朱鷺詩

送友之楚

吳市逢君宿暮天
燕臺別我話殘年
此行恐作蘆中士
不薦徒知柳下賢
黃鶴樓高風亂笛
白沙湖闊月明船
愁來不必爲長句
北雁歸時寄一箋

郊行遣懷

先生白頭意皇皇料理千秋覺太忙愁得後成靈運佛悔
教早嫁汝南王林梅泛雪舒舒綠澗竹留風析析黃此景
城中那易得急須收拾付吟囊

小閣

小閣登臨送目遲一春懷抱與誰知風花嫋娜將辭樹雪
水侵陵已滿池牽狗東門聞太息跼西里見讒疑細思
將相多如此高位從來自可危

送董通副

涪南歸

董公本健者一跌初未防我持一樽酒出送衢路旁前林
顏晚日四野浩風霜臨分已多感懷舊況難忘念昔文恭
公出身濟時康三階夾華蓋八座近文昌白屋下寒峻青
雲假翱翔小心出謙謹庶事資勛維時相業盛世濟皆

忠良二劉實規隨得公道彌光尙意先帝日輦轂起非常
天狼入紫極野鼠窺金牀聲氣連宮掖礮火徹禁廂皇子
自提劍內人多束裝鑾輿時在外眾議失倉皇公力勸回
蹕涕泣攬帝纒天威一奮振神武信恍恍臨事見謀斷時
亦賴杜房至今下馬墳人懷白雲岡喜君嗣前哲天衢再
騰驤朝廷念勳舊恩意甚減汪病免豈得已告歸何太忙
誓將守邱墓終老無出鄉余本門下士況復眷梓桑思隨
渡江去區區申椒漿臨歧不克偕淚下空沾裳

倚杖

投簪竟何日倚杖復茲辰老去與人遠春來見物新碧桃
開近眼黃鳥語翻身化理誰能會天機只是眞

許乃賡字念颺號藕舫仁和人嘉慶丁丑進士改庶吉

士授編修厯官右庶子

詩話故事史館大臣傳積卷帙既多加以覆勘使體例斟酌畫一卽謂之畫一本滿船在館覆勘嘉慶以前存傳三百八十餘卷勒成畫一本出其手定者爲多治性理之學詩不存稟故傳者絕少

曉泊桑園

泊舟臨大隄與客縱遐步秋草淒以綠彎環見村路瓠葉何幡幡欲采不可渡沿隄多桔槔井汲紛如注中有官家田灌輸足征賦平原景物殊行人屢回顧層波蕩餘霞落日片帆住水鳥背人飛鉤輶響深樹

秋夜宿證嚮齋酬諸同人

暮雨颯然至涼陰秋有聲酒深知病減鐙定得詩清別館客初臥遠鐘天欲明蟲吟殊未已鄉夢迴難成

次浣霞過靜默寺見貽原韻

招提清寂思無涯送客東門日又斜白鳥帶來煙外影綠
槐飄盡雨中花虛堂對月知禪定孤枕聞鐘感歲華休問
故人歸隱計殘更鐙火夢還家

李惺字伯子號西澗塾江人嘉慶丁丑進士改庶吉士

授檢討擢左贊善加五品卿銜有西澗全集

詩話西澗天姿英敏嗜古力學博極羣書陶鎔鼓鑄
而成一家言詩古文詞清空高澹一掃濃纖之習

釋心

目願爲我目口願爲我口足願爲我足手願爲我手區區
此一心不樂爲我有我豈負心哉問心心曰否少小附君
身周旋日已久靈府清且閒外緣息攻培不謂廿年來君
爲利祿誘卻又大迂拘事事落人後飢寒日煎迫無計可
抖擻輒以委之我我能不任受願此方寸地有似厨中白

紛紛蓼與葦辛苦乃雜揉手不習鑽刺足不慣奔走有目
喜觀書有口善飲酒惟心實難爲請君試分割我還語我
心此咎我自取汝實主人翁亦汝自取咎長安諸貴人腰
金紵大綬裘馬鮮且肥黃白積如皁汝不附渠身生卽與
我偶我命旣窮薄汝福何由厚抑汝有自來乾父而坤母
氣可沮金石光可徹箕斗細故輒悲摧自待則已苟我今
與汝約今已三十九年光迅白駒世態幻蒼狗物有如許
許事有如某某不敢復相煩但願堅自守先以三昧火爲
汝焚其葍繼以三昧水爲汝滌其垢沃劣不須膏埽愁不
用帚翩翩鳥出籠洋洋魚脫筍皮囊有壞時祝汝長不朽
書此券來茲時維歲乙酉

庚戌元日日食一百二十韻

嶺南逢元日客子心悲傷旁觀謬測度謂我思故鄉故鄉
雖云遠可以理歸裝況自入山來泉石慰膏肓同行三數
人形跡亦相忘晨起但一揖隨意傾壺觴賀客概無有酬
應息奔忙轉覺此間樂在家徒皇皇所悲竟何事欲寫先
徬徨念自癸卯後木饑金不穰陝西三歲旱河南五歲荒
牛無一束藁有如墳首羊耕無可耕處屠以充飢腸十室
去其半半死半流亡戊申乃大熟禾黍幸登場竊謂脫此
厄六幕臻平康豈知是歲夏大水竟汪洋或云洞庭湖白
晝日無光中有數龍鬬莫辨赤白黃腥風挾濁浪萬鼓聲
雷硯一湧高於山一瀉何可當混混湖與江茫茫荆訖揚
翼軫斗牛間氣溼如銀潢去年水更大發難仍沅湘所決
失隄堰所浸蔑城隍江甯地頗高鍾阜幾懷襄別有浙西

水頂潮趨錢塘加以百日雨勢欲無餘杭浙之杭嘉湖北
達蘇松常又北爲鎮江財賦甲他方歲額千餘萬地丁兼
白糧次如湖南北安徽及豫章亦俱供飛輓亦且賴輸將
一浸數千里何者爲苞稂無米入漕運何以實京倉災民
極可憫苦況不可詳有屋在水中渺不見屋梁爺娘兒女
子託命於舟航嗷嗷中澤鴻於何謀稻梁死者委溝壑存
者猶羸庀天下有大命官倉有常平常平久無實社倉亦
虛名欲糴無可糴議糴徠遠商巴蜀米價賤千里連帆檣
道遠風濤惡販到價則昂有錢猶可買無錢三跟踉欲賑
無可賑馳奏叩天闕批章下戶部司農詢曹郎頻年逋賦
多災區例緩征金屬頒大庫錢並支水衡昔有盈無縮今
有縮無盈雖有縮無盈猶且別籌量通融資挹注一滴亦

天漿去年干在己今年干在庚今年第一日日食令人驚
午刻歷未刻計食五分贏二氣縮橐籥日者太陽精履端
重首祚元日啟新正而乃遭此變能勿心忤忤熙朝大一
統駿業天所昌幅員廓無外寶籙尤靈長下自元明宋上
溯虞陶唐六代六聖人從古見未嘗今上夙敦敏嗣服提
乾綱四目之所運四表咸輝煌閱今三十載暇食恆不遑
所冀百君子爲棟爲榦楨堂堂位宰輔先自篤忠貞大度
休休然寸心冰玉清袞職一無闕運量周咳紘六官有官
守毋偷毋紛更言官有言責毋噤口不鳴其任封疆者赫
然民所望安民在察吏吏有良不良墨吏一推排脂膏塗
囊囊酷吏一哮吼魂魄落銀鐺茸吏百不理宿牒堆滿牀
是皆民之蠹得不重懲創奉法毋斃法思患宜豫防視寇

攘姦宄如猘獠豺狼欺君大不敬諱盜大不祥養癰必流
毒剜肉難補瘡兵以練乃勁簡校肅戎行穀以蓄乃足句
稽謹蓋藏事事務實濟內外同匡襄學者毋不破弛者毋
不張氛翳頓豁除險阻化康莊閭閻獲安堵一意力農桑
天方命百神爲民節陰陽日雨雨時若日暘無恆暘旱魃
及水怪曷敢肆彼猖獗黃人行捧日雨耳垂璧璫天保佑天
子端拱坐明堂泮奭爾游矣純嘏永無疆澤水儆帝堯大
旱疲成湯從古多日食日食亦無妨造化遞消息氣數交
縱橫剝正欲其復晦正欲其明殷憂以啟聖天具有深情
聖躬則已勞臣躬則已榮溫飽逮僮僕豈復別有營葵藿
小草耳心爲太陽傾矧人含血性慝之卽丹誠所冀紆主
憂力與氣數爭天心非不仁在人宜作強毋以繞指柔誤